

UPNA LE KAMMAL (6)

Upna i cih in mihing lungsim ngaihsutna pan ahong pokhia hilo in, mihingte lungtang sungah akivawh hizaw hi. Khaici vawhpa in upna khaici ahi nuntakna thuman thutak eite lung sim, lungtang sungah hongvawh in, eite in tua khaici vawhna leihoih leipha te i hihding akisam ahihi (cf. Mt 13:1ff). Eite sungah hongkivawh khaici pen eithu in i khekthei kei a, zong i nial thei kei hi. Tua khaici in tunglampan eite sungah hong kipia hi in, eite in asangsiam te i hihding athupi ahihi. Hihthu hangin, Christian upna i cih in, hong kipia hi a, eite zontawm, vaitawm thuthak theihna ahikei hi (Efesa 2:7-8). Mikhat in Pasian ka um hi acih ciangin: Kei ma nuntakna sungah hongki vawh anungta thu ka um hi acihna ahihi. Banghanghiam cih leh akipat cil in, Thu om a, Thu in Pasian hi-in, Thu hangin na khempeuh kipiangsak a, Thu in nuntakna hi-in, tua nuntakna Thu pen mihingte sungah khaicibangin kivawh ahihman ahihi (Cf Jn 1:1-3). Thu ahi Pasian in, eite sungah hongteeng ahih manin amahtawh kizopna anei thei ihi a, tua thu hangin, upna in Pasian tawh hong kizomsak, pumkhat hongsuaksak Pasian letsong ahihnam teltak in hong phawksak hi.

Nuntakna hongpia 'Thu' in eite sungah kivawh in, eite sungpan pokhia ahih manin, tua 'Thu' ii gag agahsak dingin Topa in eite hongdeih ahihi. Topa in honggen in ah: Kei mah in leengui kahi a, note in ahiangte nahi uhhi. Kei tawhlo in bangmah na sem theikei ding uhhi. Keitawh kizom in, note sungah keima thu anuntak leh, gahtampi nagahding uhhi (cf. Jn 15:5-8) ci-in, hong vaikhak hi. Hih anungta Pasian thu hangin, eite in thu man thutak leh diktatna tawh Pasian gam alamdingte ihihi. Pasian thu leh akammal in diktat lohna, thuman lohna leh nenniamna namkim te tungah thuman na, diktatna leh khat le khat ki-itna tawh gualzawhna ala ding ahihi. Lamkhat panin genleng, Pasian thu le akammal eite sungah om ahih manin, Pasian thu um eite in khat le khat ki langneihna apiangsak thei, minam khat le khat, khua khat le

khat kikal ah, thuman lohna, kilemlohna, kinenniam na apiang sakthei thute tungah Pasion thu le Pasion kammal hangin gualzawhna ala dingte ihihi (cf. *Verbum Domini*, 100).

Nuntakna hongpia ahi, avanglian Pasion kammal le Pasion thu siksian in, tuhun khang leh paizia te etsiam in, khaikaak siam a, galvil gina lote banglo in, khangthak khuahun te nuai-ah pil vangin, upna hangin hangsanna, cihtakna leh thuakzawh na tawh mainawt dinghun sungah i lotta hi. Pope Paul VI hong vai khakna ah:

Lungdamna thu tawh kituak in thukhen in, deihsa leh ngaihsutna te puahpha in, mihing nuntakzia leh lungsim thutheihtheih na te ah Pasion kammal leh gupna thu tawh i ki lebulh khakloh nading eite in nisim i hanciamloh aphanawh thu ahihi (Apostolic Exhortation *Evangelii Nuntiandi*, 18).

Hih thu hangin, gamkhantohnang ahi a, minam khantoh nang ahizongin, hanciamna leh deihsakna tawh nasem khempeuh in, amaute gamtatna, thugenna, sepna bawlna khempeuh ah mite phattuumna ding ahih mahbangin, teeltuam mi pawlkhat ii phattuumna ding, teeltuam mi pawlkhat ii hauhna manna ding leh, teeltuam mi pawlkhat bek ii nuntaknuam ding ngaihsun loin, Samaritan mihoihpa bangin, avengpa amusiam, atheisiam leh ahuhsiam mi ahihding thupi hi (Cf *Verbum Domini*, 100).

Tua banga nasepna leh hanciamna te ah deklam tuktum zong galsuak thei in, siingkuang le aikuangzong hongki khek sak thei hi. Ahi zongin, tuate in Christian thu um mite nasepna khaktan zolo dinga, eite sunga om Pasion thu nungta in leitung ading thutawh nuntakna hi loin, tawntung nuntakna dinghi cih thu, phawk tawntung natawh nasep ding ahihi. Tua bang nuntakna in, leitungah Pasion thu leh Pasion kammal hangin agualzo te hong suaksak ahih manin, laulo in, khutkilen a, ma i pan khawm diamdiam theihding a thupi ahihi (cf *Verbum Domini*, 100). Tua bang nasepna in leitung maitang zemdinga, leitung puahpha in, gam leh minam puahpha thei bek dinghi.

Hitler in amite adingbek phattuumna leh hoihna abawlnop man in, amah le amipih te in sihipih in, tuni dongciang, migilo pen khat in kiciamteh hi. Upna in Pasian thu le Pasiam kammal tawh nuntakna ahihmah bangin, eisunga a om anungta Pasian kammal le Pasian thu kimakaih sak in, khantohna ding ahi a, gamvai minam vai nasep nate ah ahizong in, deidan leh pampaih neilo in, Samaritan mihoih pa bangin gah tampi agah dingin Topa in thupha hongpia ciatta hen. Amen.

References:

Benedict XVI, Post Synodal Exhortation, *Verbum Domini*. Vatican: Libreria Editrice Vaticana, 30th September 2010.

Benedict XVI, "Message for the 2009 World Day of Peace" (8 December 2008): *Insegnamenti* IV, 2 (2008): 792-802.

Paul VI, Apostolic Exhortation *Evangelii Nuntiandi*. 8, December 1975.